

Kalaallit Nunaanni ilinniartitaanermut inuussutissarsiutinillu siunnersuisarneq pillugu Namminersorlutik Oqartussat inatsisaat pillugu Namminersorlutik Oqartussat inatsimmik nalunaarutaat

Matumuuna Kalaallit Nunaanni ilinniartitaanermut inuussutissarsiutinillu siunnersuisarneq pillugu Inatsisartut inatsisaat nr. 4 29. novemberi 2013-meersoq, Inatsisartut inatsisaat nr. 12, 27. november 2018-meersumi aamma Inatsisartut inatsisaat nr. 18, 1. december 2021-meersumi allannguutit ilanngullugit, nalunaarutigineqarpoq.

Kapitali 1

Siunertaa nassuiaatillu

§ 1. Kikkulluunniit ilinniarnissaq inuussutissarsiummillu ingerlataqalernissaq siunertaralugu akeqanngitsumik pitsaassusilimmillu ilitersorneqarsinnaaput.

Imm. 2. Ilitersuisarneq pingaartumik inuusuttunut tunngatinneqassaaq, takukkit §§ 19-23.

Imm. 3. Ilitersuisarneq ilinniakkanik taamaatitsiinnartarnerit allanillu toqqaqqittarnerit pinaveersaartinnissaannut aammalu ilinniartut ataasiakkaat ilinniartulluunniit ilinniakkamik toqqaakkaminnik ilinniakkanik inuttullu annertunerpaamik pissarsiaqarlutik naammassinnittarnissaannut annertunerpaamik tapersiissaaq.

Imm. 4. Ilitersuisarneq aamma ataasiakkaat namminneq paasissutissanik ujarlersinnaanissaannut atuisinnaanerannullu tapersiissaaq, tassunga ilanngullugit qarasaasiaq atorlugu paasissutissanik ilitsuinersarnermillu neqeroorutit, ilinniagaq pillugu, ilinniarfiit siunissamilu suliffissat.

§ 2. Ilitersueriaatsit imm. 1-7-imi taaneqartut ingerlanneqartassapput ilitersueriaatsinut assigiinngitsunut immikkut piumasaqaatit ataqqillugit:

1) Ilinniagaqarneq pillugu ilitersuineq tassaavoq ilitersuineq ilinniagassamik ilinniaqqinnissamilluunniit toqqaanissamut tunngasoq.

2) Inuussutissarsiutinut ilitersuisarneq tassaavoq ilitersuineq inuussutissarsiummik toqqaanissamut tunngasoq, tassunga ilanngullugit ilinniareernerup kingorna inuussutissarsiuteqalersinnaanerit, allamik inuussutissarsiuteqalerneq suliffeqarnerlu aamma suliffissaaleqinermi suliffeqarneq.

3) Naammassinninnissamut ilitersuineq tassaavoq ilinniartut ilinniagaqartulluunniit ilinniakkamik pineqartumik naammassinnissaat siunertarlugu ilinniagaqarnerup ingerlanerani ilitersuineq.

- 4) Ingerlaqqeriarnissamut ilitersuisarnek tassaavoq ilinnigaqarnermit ilinniagaqaqqinnissamut ikaarsaariarnermut atatillugu aamma ilinniaqarnermit suliffeqalernermit atatillugu ilitersuisarnek.
- 5) Inunnik ataasiakkaanik ilitersuisarnek tassaavoq inuit ataasiakkaat immikkut ilitersorneqartarnerat.
- 6) Ataatsimoortunik ilitersuisarnek tassaavoq eqimattanik piffissami ataatsimi ilitersuisarnek.
- 7) Ujartuilluni ilitersuisarnek tassaavoq kaammattorneqarani innuttaasunut ataasikaanut saaffiginnilluni ujartuilluni ingerlatsinikkut ilitersuisarnek.

Kapitali 2

Akisussaaffik aaqqissuussaaneralu

Qitiusumi akisussaaffik

§ 3. Naalakkersuisut pisussaaffigaat isumagissallugu:

- 1) nalilersuisarnek aamma ineriartortitsineq siunnersuisarnermik ingerlatsinermi,
- 2) siunnersuisarnerit ataqatigiissaarnissaat,
- 3) siunnersuisarnermut tunngatillugu paasissutissiisarnek,
- 4) siunnersuisarnermit atortussanik suliaqartarnek siammartitserisarnerlu,
- 5) ilitersuisartunik ilinniartitsisarnek ilinniaqqittarnerlu,
- 6) supervision-ertitsisarnek najukkani ilitersuisarfinnut atatillugu,
- 7) misilittakkanik aamma ilisimasanik avitseqatigiittarnek,
- 8) attaveqaqatigiiffliortarnernut tapersersuisarnek, aamma
- 9) tarnikkut aamma isumaginninnikkut siunnersuisarnek, tamatumani aamma peqqissaasarnek ilinniagaqartunik., tak. § 18, imm. 2.
- 10) nuna tamakkerlugu ilitersuinissamut periusissiornerup ingerlaavartumik nutarterneqartarnissaa.

§ 4. Iltersuisarnek pillugu paasissutissiisarnermut atatillugu, takuuk § 3, nr. 3, ilitersuisarnek pillugu quppersakkap pilersinnissaa ingerlannissaalu Naalakkersuisut isumagissavaat. Iltersuisarnek pillugu quppersagaq sumiiffinni ilitersuisarfinni ilinniarfinnilu ilitersuisartut, ilitersorneqarusuttunut allanullu ilinniarnek inuussutissarsiuteqarnerlu pillugit paasissutissinneqarnissamik kissaateqartunut internetikkut paasissutissiisarnermi ilitersuisarnermilu sakkussaq.

Imm. 2. Iltersuisarnermi quppersagaq Kalaallit Nunaani avataanilu ilinniarfusinnaasut pillugit ilinniakkat ataasiakkaat sumut atorneqarsinnaanerannik piffissanilu aalajangersimasuni suliffeqarnek pillugu paasissutissanik imminnut sanilliunneqarsinnaasunik imaqassaaq.

Imm. 3. Iltersuisarnermi quppersagaq pillugu malittarisassanik annertunerusunik Naalakkersuisut aalajangersaasinnaapput.

§ 5. Attaveqaqatigiittarnermik pilersitsinermit atatillugu, takuuk § 3, nr. 8, nuna tamakkerlugu attaveqaqatigiiffusartup pilersinnissaa Naalakkersuisut isumagissavaat, tamatumani sumiiffinni ilitersuisarfiit, ilinniarfiit, kattuffiit, peqatigiiffiit il.il. pissutsit ilinniartitaanermit inuussutissarsiutinullu pingaaruteqartut tamaasa pillugit isummaminnik saqqummiisinnaallutik, oqallissinnaallutik nalilersuisinnaallutillu.

Imm. 2. Nuna tamakkerlugu attaveqaqatigiiffiusartoq pillugu malittarisassanik annertunerusunik Naalakkersuisut aalajangersaasinnaapput.

§ 6. Suliassat §§ 3-5-mi aamma § 8-mi taaneqartut taakkuluunniit ilaat pillugit nuna tamakkerlugu ilitersuisarfimmik Naalakkersuisut pilersitsisinnaapput.

§ 7. Iltersuisarnerup ineriartorteqqinnissaa pillugu Naalakkersuisunut ilitersuisarnissaq siunertaralugu Kalaallit Nunaanni Iltersuisarnek pillugu Siunnersuisoqatigiit Naalakkersuisut pilersissavaat.

Imm. 2. Siunnersuisoqatigiit 6-inik inuttaqarput, tamatumunnga inassuteqartoqarnera naapertorlugu, tak. imm. 3, Naalakkersuisunit inuttut piginnaanitik naapertorlugit toqqarneqartartunik piffissamut ukiunik 4-nik sivisussusilimmut. Ilaasortaq toqqaqqinneqarsinnaapput. Siunnersuisoqatigiit ataatsimut sinniisuuffigissavaat siunnersuisarnek, ilinniartitaanerni aamma inuussutissarsiutini paasisimasaqassuseq.

Imm. 3. Tulliuttut tamarmik siunnersuisoqatigiinnut ilaasortassamik ataatsimik inassuteqartassapput:

- 1) Sulisitsisut kattuffii.
- 2) Sulisut kattuffii.
- 3) Ilinniagaqartut kattuffii.
- 4) Kommunit ataatsimoorlutik.
- 5) Ilinniarfiit.
- 6) Nakorsaaneq peqqinnissamik nakkutilliisoq.

Imm. 4. Kattuffiit suliaqarfiillu innersuussisut isumaqatigiillutik ilaasortassamik ataatsimik innersuussippata taanna toqqarneqassaaq. Innersuussineq pillugu isumaqatigiinngittoqarnerani, innersuussat akornanni ilaasortassamik Naalakkersuisut toqqaasassapput.

Imm. 5. Siunnersuisoqatigiinni ilaasortat akunnerminni siulittaasussaq toqqartassavaat.

Imm. 6. Siunnersoqatigiit suliassaar pillugit malittarisassanik Naalakkersuisut aalajangersaasinnaapput, tassunga ilanngullugu siunnersuisoqatigiit suleriaasiat.

§ 8. Kalaallit Nunaanni Iltersuisarnek pillugu Siunnersuisoqatigiit allatseqarnerat Naalakkersuisut isumagissavaat.

Imm. 2. Kalaallit Nunaanni Iltersuisarnek pillugu Siunnersuisoqatigiit ataatsimiinneranni ilaasortat illoqarfitsik qimallugu ataatsimiigartariaqartillugit, Inatsisartuni, Naalakkersuisunilu il.il. ilaasortat akissarsiaat il.il. pillugit Inatsisartut inatsisaanni Inatsisartunut ilaasortanngitsunut akissarsiat tapisiallu pillugit malittarisassat malillugit ullormusiaqassapput angalanerannilu aningaasartuutat matussuserneqartassallutik.

Sumiiffinni akisussaaffiit

§ 9. Kommunalbestyrelsip akisussaaffigaa Inatsisartut inatsisaat naapertorlugu ilitersuisoqartarnissaa kommunimi innuttaasunut, tak. taamaattoq § 3, nr. 9 aamma § 10.

§ 10. Ilinniarfiit ilinniagaqarniarlutik qinnuteqartunut ilinniakkamik naammassinninnissamut ikaarsaariarnermilu ilitersuisarnissamut akisussaapput. Ilinniakkanut pineqartunut malittarisassat atuuttut malillugit ilitersuineq ingerlanneqassaaq, taamaattoorli tak. imm. 2-4.

Imm. 2. Ilinniartit naammassinninnissamut ilitersuinerat ilinniagaqartup ilisimasaanik, pikkorissusianik ilinniakkamilu piginnaasaanik ikorfartuillunilu ineriartortitsissaaq. Tassunga ilaapput inummut inooqataanermullu pissutsit, ilinniartitaanermi atuartitsissutinik qaffasissutsinillu toqqaaneq, takkutinngitsoorneq, kajumissuseq, karakterit, soraarummeernermi periuseq, soraarummeernissamut annilaanganeq, ilinniariaaseq, sulinermi ileqqut, suleqatigiissinnaassuseq aamma ilinniakkami atuaqatigiinnilu atugarissaarneq pillugu ilitersuineq. Naammassinnissinnaanermut ilitersuineq siusissukkut pitsaaliuilluni suliniutitut tunniunneqassaaq ilinniagaqartup ilinniarnernup annertuumik artukkiisutut misigisaqannginnissaa atuartitsinermullu naleqqiullugu katataannnginnissaa qulakkeerniarlugu.

Imm. 3. Ilinniartit ikaarsaariarnermi ilitersuinerisa qulakkiissavaat ilinniartut ilisimatinneqarneq, eqqarsarfiusumik pivusorsiortumillu tunngaveqarlutik ilinniakkamik, inuussutissarsiummi aamma atorfimmi ingerlavissamik toqqaasinnaallutik. Tassunga ilaapput piginnaasat soqutigisallu paasisaqarfigineri, ilinniakkap imarisaanut, piumasaaqataanut, naatsorsuutigisanut, ingerlaqqinnissamut periarfissanut, ilinniartitsinermut, kulturimut avatangiisinut suliffeqarfinnillu ilisimasaqalernissap qulakkeerneqarnera.

Imm. 4. Naalakkersuisunit akuerisaasumik ilinniartitsinermik inuussutissarsiutinullu siunnersuisarnermik ilinniagaqarsimasunit imaluunniit tassunga assingusumik ilitersuisinnaanermik piginnaasaqarnermik uppersaasinnasunit inunnit naammassinninnissamut ikaarsaariarnermilu ilitersuineq ingerlanneqassaaq. Naalakkersuisut tamanna pillugu ilinniartitsinermik qinnuteqartoqareernerata kingorna ilitersuisarnerup inummit siunnersuisarnermi allaanerusunik piginnaasaqartumit utaqqiisaasumik ingerlanneqarnissaa akuerisinnavaat, ilitersuisartoq pineqartoq Naalakkersuisunit akuerisaasumik ilinniartitsinermik siunnersuisarnermillu ilinniarnermik ingerlataqarpat ilinniarnissamilluunniit pilersaaruteqarpat.

§ 11. Iltersuisarnerup ataqatigiissarnissaa, annertusarnissaa sammiveqarnissaalu siunertaralugit kommunini ilitersuiffinnik pilersitsinissap ingerlatsinissallu isumaginissaat kommunalbestyrelsit pisussaaffigaat.

Imm. 2. Kommunalbestyrelsip qularnaassavaa kommunit qitiusumik ilitersuisarfiisa ilitersuisarnerminnik sulianik ingerlatsinerminni inatsit naapertorlugu kommunini suliffissarsiuussisarfinnik suleqateqarnissaat, tak. suliffissarsiuussisarneq il.il. pillugit Inatsisartut inatsisaat

§ 12. Kommunalbestyrelsip isumagissavaa kommunimi qitiusumik ilitersuisarnermik ingerlatsiviup ilitersuisarnikkut neqeroorutaasa piginnaaneqarluartunit ilitersuisartunit ingerlanneqartarnissaa, tak. imm. 2, aamma inissat naleqquttut iluanni ingerlatsisoqartarnissaa.

Imm. 2. Inunnit Naalakkersuisunit akuerisaasumik ilinniartitsinermik ilitersuisarnermillu ilinniagaqarsimasunit imaluunniit tassunga assingusumik ilitersuisinnaanermik piginnaasaqarnermik uppersaasinnasunit ilitersuisarneq ingerlanneqassaaq. Naalakkersuisut tamatumunnga kommunalbestyrelsimiit qinnuteqartoqarneratigut periarfissaqartissinnaavaat ilitersuisarnerup utaqqiisaasumik inummit ilitersuisarnermi immikkut piginnaaneqanngitsumit ingerlanneqarallartarsinnaanera, ilitersuisartup ilinniagaqalernerani imaluunniit ilinniagaqarnerani ilinniartitaanernut ilitersuisarnermullu suliassanut Naalakkersuisunit akuerisaasumik.

§ 13. Ilitsersuinikkut suliniutinik aqutsinermut aamma ilinniartitaanermut suliffeqarnermullu tunngatillugu anguniakkanut naleqqiullugu suliniutit siunnerflernissaannut atugassanik nuna tamakkerlugu paasissutissanut tunngavinnik pilersitsinissaq siunertaralugu ataasiakkaanut ilitsersuinerni suliniutitik pillugit aamma innuttaasut ilinniartitaanikkut suliffeqarnikkullu killiffii pillugit paasissutissat kommunalbestyrelsinit ilinniarfinniillu nalunaarsorneqarlutillu Naalakkersuisunit nalunaarutigisassavaat.

Imm. 2. Imm. 1-imi siunertarisatut taaneqartut innersuussutigalugit, kommunalbestyrelsit, ilinniarfit, meeqqat atuarfii namminersortut, efterskolit folkehøjskolellu ilinniarfiup ilitsersuisoqarnikkut suliai pillugit paasissutissanik nalunaaruteqaqqullugit Naalakkersuisut peqqusisinnaapput.

Imm. 3. Imm. 1 aamma 2 naapertorlugit nalunaarsuisarneq paasissutissanillu nalunaaruteqartarneq pillugit Naalakkersuisut malittarisassanik aalajangersaasinnaapput, tassunga ilanngullugu paasissutissat elektroniskimik nalunaarsorsimanissaannik nalunaarutigineqarnissaannillu piumasaqarsinnaaneq pillugu.

Kapitali 3

Ilitsersuisarnerup aaqqissuunneranut ingerlanneqarneranullu sinaakkutit

§ 14. Ataqqinninneq, naliğiissitaaneq, ammasuuneq tatiginninnerlu aallaavigalugit ilitsersuisarneq ingerlanneqartassaaq aammalu ataasiakkaat soqutigisaat inuttullu piginnaasaat ilanngunneqartassallutik, tassunga ilanngullugit aqqissuussaangitsumik piginnaasat, maannamut ilinniagaqarsimaneq suliffeqarsimanerlu, kiisalu ilinniarsimasunik sulisoqarnissamik inuussutissarsiortullu namminersortut pisariaqartitaattut ilimagisat.

§ 15. Ilitsersuisarneq aaqqissuunneqartassaaq ingerlanneqartassallunilu paasissutissat, ilinniartitsineq, ingerlatat inunnillu ataasiakkaanik oqaloqateqarneq ataqatigiissillugit.

Imm. 2. Ilitsersuisarneq imatut aaqqissuunneqartassaaq ilitsersuinermi ataqatigiissitsisoqarluni, siuariartortitsisoqarluni assigiinngiiaartitsillunilu, tassunga ilanngullugit ilitsersorneqartup nammineq piginnaasani pillugit qisuariarnissaa aammalu ilinniakkamik inuussutissarsiummullu toqqaanermut tunngatillugu periarfissat qulakkeerlugit.

§ 16. Ilitsersuisarnermi neqeroorutit ataasiakkaat ataqatigiissarneqassapput, taamaalilluni ilitsersuisarnermi ingerlatat imminnut atassallutik, tassani tamat ilitsersorneqarnissamik pisariaqartitaat annertunerpaamik qulakkeerneqassallutik.

§ 17. Ilitsersuisarneq immikkoortut ilinniarfiillu soqutigissaannut atatinneqassanngilaq.

Kapitali 4

Ilitsersuisarnermi suliassat

Tamanut tunngasut

§ 18. Ilitsersuisarnermi suliassat Inatsisartut inatsisaat una naapertorlugu tassaapput:

1) Kalaallit Nunaanni ilinniagaqarnissamut periarfissat pillugit ilitsersuisarneq,

2) Kalaallit Nunaata avataani tamatumanilu aamma Danmark-imi ilinniagaqarnissamut periarfissat pillugit ilitersuisarneq,

3) Suliffissat aamma suliffinni qaffakkiartorsinnaanermut periarfissat pillugit ilitersuisarneq,

4) aningaasaqarnermut tunngasutigit, tamatumanilu aamma ilinniagaqarnersiuteqarnermut tunngasutigit siunnersuisarneq, aamma qinnuteqarnermut atatillugu immersugassanik immersuisarnernut tunngatillugu,

5) ineqarnermut tunngasunik ilitersuisarneq,

6) inummut tunngasutigit aamma tarnikkut pissutsinut tunngasutigit ikiorserneqarnissamik ilitersuisarneq,

7) tarnikkut inuttullu atukkanut tunngasutigit siunnersuisarneq, tamatumani aamma peqqissaasarneq ilinniagaqartunik, tak. imm. 2, aamma

8) ilinniagaqarnermik aallartitsinermut qinnuteqarnermullu atatillugu ilinniagaqarnersiutinillu qinnuteqartarnermi periutsit pillugit ilitersuineq.

Imm. 2. Imm. 1, nr. 7-imi ilinniagaqartutut paasineqassapput inuit ilinniakkamik ingerlatsisut aamma ilinniagaqartut, pikkorissaqqinnermik ingerlatsisut suliffissanut, ilitersuisarnernut pikkorissaqqinnernullu qitiusumik ingerlatsivinni.

Imm. 3. Ilitersuinermi suliasat pillugit Naalakkersuisut annertunerusunik malittarisassiorsinnaapput.

Inuusuttunut ilitersuineq

§ 19. Inuusuttunut 18-it tikillugit ukioqartunut ilitersuisarneq pillugu kommunini atuarfeqarfiit, kommuninilu ilitersuisarfiit ingerlaavartumik suleqatigiittarnissaat kommunalbestyrelsit qulakkiissavaat.

Imm. 2. Imm. 1 malillugu ilitersuinermut atatillugu sumiiffinni ilitersuisarfiit kommunini atuarfeqarfiit, meeqqat atuarfi namminersortut, efterskolit højskolillu aamma ilinnarfiit ikaarsaariarneq pillugu ilitersuinerisa piareersarneranni ingerlatsinerannilu ikiutissapput.

Imm. 3. Atuartut naammassisut pillugit meeqqat atuarfisa iliuusissatut pilersaarutaat suliarineqarnik assilinerannik kommunini ilitersuisarfiit tigusaqarnissaat atortullu ilitersuinermi atugassat pisariaqartut, tassunga ilanngullugit atuartut ataasiakkaat atuarnermik naammassinermut uppersaataat karakterillu pillugit paasissutissat, kommunalbestyrelsit qulakkiissavaat.

Imm. 4. Atuartunut atuarnermik naammassinnittunut iliuusissatut pilersaarutit meeqqat atuarfianni suliarineqartut assilinerannik ilinniarnertuunngorniarnarfiit, inuussutissarsiutinut ilinniarfiit imaluunniit qitiusumik ilinniarfiit tigusaqarnissaat kommunalbestyrelsit qulakkiissavaat.

Imm. 5. Kommunini atuarfeqarfiit kommuninilu ilitersuisarfiit suleqatigiinnerat pillugu aamma ilinniarfiit kommuninilu ilitersuisarfiit suleqatigiinnerat pillugu Naalakkersuisut annertunerusunik malittarisassiorsinnaapput, tassunga ilanngullugit ikaarsaariarnermi ilitersuisarnerup piareersarnera ingerlanneralu pillugit suleqatigiinneq pillugu.

§ 20. Atuarfiit ilinniarfiillu aamma kommunini ilitersuisarfiit inuusuttunut immikkut ilitersorneqaratik ilinniarnermik aallartitsinissamik ingerlatsinissamillu inuussutissarsiormilluunniit toqqaanissamik ajornartorsiuteqartunut ajornartorsiuteqartussanulluunniit siunnerfeqartumik ilitersuisassapput.

Imm. 2. Inuusuttunut meeqqat atuarfiannit assigisaanniilluunniit atuartussaataitanermik naammassillutik atuarunnaarsimasunut, ilinniarnermik inuussutissarsiummilluunniit aallartitsisimanngitsunut imaluunniit

ilinniagaqarnermik unitsisamasanut ujartuilluni ilitsersuisoqartassaaq.

Imm. 3. Inuusuttut kissaatigisaat ilitsersuineri pitsaassusilerneqassapput, inuusuttullu nammineerlutik angerlarsimaffiillu suleqatigilugit ilinnigassamik inuussutissarsiutissamillu toqqaasinnaalersinneqassallutik.

Imm. 4. Inuusuttunut 18-it inorlugit ukiulinnut ilitsersuineri ilitsersuineq imatut aaqqissuunneqartassaaq angajoqqaatut oqartussaassuseqartut ilitsersuineri inuusuttullu ilinniarnissamik pilersaarusiorteranni peqaatinneqarlutik.

Imm. 5. Ilitsersuisarnerup imarisassaa, aaqqissuunneqarnera piffissatigullu inissinneqarnera ataasiakkaat inissisimanerannut pisariaqartitaannullu naleqqussarneqartassaaq.

§ 21. Kommunit ilitsersuarsarfi ilitsersuineri ataatillugu inuusuttoq 18-it inorlugit ukioqarpas meeqqallu atuarfianni naammasseriinnerup kingorna ilinniarnermik inuussutissarsiorterimilluunniit allartitsimanngippat imaluunniit inuussutissarsiorterimik ilinniarnermilluunniit taamaatitsisimappat inuusuttut taakkunungalu angajoqqaatut oqartussaassuseqartut suleqatigilugit ilinniarnissamut iliuusissatut pilersaarummik suliaqassaaq.

Imm. 2. Ilinniarnissamut iliuusissatut pilersaarummi atuartup iliuusissatut pilersaarut meeqqap atuarfinni ilinniartitsisuni isumasioqatigilugit suliarisimasaa aallaavigineqassaaq, takuuk meeqqat atuarfiat pillugu Inatsisartut inatsisaat. Inuusuttunut meeqqat atuarfianni iliuusissatut pilersaarusiorterimanngitsunut ilinniarnissamut pilersaarutit sapinngisamik inuusuttup taamanikkut atuarfigisimasaa peqataatillugu suliarineqarnissaa sumiiffimmi ilitsersuisarfiup qulakkiissavaa.

§ 22. Ilinniarnissamut pilersaarummi inuusuttup siunissami ilinniagassatut toqqagaani anguniagassat aalajangersarneqassapput, tassunga ilanngullugit anguniakkat angunissaannut piumasaqaatit.

Ilinniagassatut toqqagassatut kissaatigisap piviusunngortinneqarnissanut tunngatillugu inuusuttup suliamik ingerlatsineri inuttullu piginnaasaasa ineriartortinnissaat siunertaralugu ingerlatassanik aalajangersimasunik ilinniagaqarnissamut iliuusissatut pilersaarummi aamma aalajangersaasoqassaaq.

Imm. 2. Ilinniagaqarnissamut iliuusissatut pilersaarutit piviusunngortinnissaa pillugu aamma anguniakkat nutaat nutartikkalluunniit aalajangersarnissaa pillugu inuusuttoq 18-it ataallugit ukiulik tassungalu angajoqqaatut oqartussaassuseqartoq pisariaqartitsineq malillugu minnerpaamillu ukiumut ataasiarlutik oqaloqatiginissaat kommunit ilitsersuisarfiisa qulakkiissavaat.

Imm. 3. Ilinniagaqarnissamut iliuusissatut pilersaarutit pillugit malittarisassanik annertunerusunik Naalakkersuisut aalajangersaasinnaapput, tassunga ilanngullugit pilersaarutit isikkui imarisaallu aammalu nangitseqqiisarneq pillugit.

§ 23. Kommunini innuttaasut inuusuttunut 18-it ataallugit ukioqartunut meeqqat atuarfianni naammassisimasunut aammalu ilinniagaqarnermik inuussutissarsiuteqarnerimilluunniit aallartissimanngitsunut imaluunniit ilinniarnermik taamaatitsisimasunut angajoqqaatut oqartussaassuseqartut ilinniagassatut inuussutissarsiutitullu toqqagassat inuusuttunut neqeroorutigineqartut pillugit nalinginnaasumik ilisimatinneqarnissaat kommunini ilitsersuisarfiit isumagissavaat.

§ 24. Ilitersuisarnerni suliaasanut aningaasartuutit suliaasanik inatsisitigut pisussaaffeqartut akilissavaat.

Imm. 2. Kalaallit Nunaanni Ilitersuisarneq pillugu Siunnersuisoqatigiit ingerlatsinerannut, takuuk § 8, imm. 2, aningaasartuutit Nunap Karsiata ukiumoortumik tapiissutai atorlugit akilerneqartassapput.

§ 25. Naalakkersuisut kommunalbestyrelsimut naammassisassanut isumaqatigiissuteqassapput, inatsit naapertorlugu ilitersuisarnernik suliaasanik suliaqartarneq pillugu.

Imm. 2. Naammassisassanut isumaqatigiissummi ilaassapput kommunimi ilitersuisarnikkut suliani anguniagassat, tamatumunngalu aallaavittut tunngaviusussat. Taannalu aamma imaqassaaq ilitersuisarnermi anguniagassanik tigussaasunik.

Imm. 3. Naalakkersuisut naammassisassatut anguniakkani naammassinnissimannginneq iliuuseqarfigisinnaavaat, kommuninut ataatsimoorussanik tapiissutini annikinnerulersitsinikkut.

§ 26. Kommunalbestyrelsit, ilinniarfiit, meeqqat atuarfi namminersortut, efterskolit højskolillu inatsit manna naapertorlugu aqutsinerat Naalakkersuisut nakkutigissavaat.

Imm. 2. Paasissutissanik inatsit naapertorlugu suliaast ingerlanneqarnissaannut pisariaqartunik kommunalbestyrelsit ilinniarfiillu Naalakkersuisut piumasaqarfigisinnaavaat.

Imm. 3. Inatsisartut inatsisaanni uani siunertat ilanniippata kommunalbestyrelsit ilinniarfiillu misileraanissaat Naalakkersuisut akuerisinnaavaat.

Kapitali 6

Atuutilersitsinermut, ikaarsaariarnermut atorunnaarsitsinermullu aalajangersakkat

§ 27. Inatsit 1. januar 2014-imi atuutilersinneqarpoq. Tassunga peqatigitillugu Kalaallit Nunaanni ilinniarnermut inuutissarsiutinillu ilitersuineq pillugu Namminersornerullutik Oqartussat nalunaarutaat nr. 5, 3. september 1982-imeersoq atorunnaarsinneqarpoq.

Inatsisartut inatsisaat nr. 12, 27. november 2018-meersoq (Ilinniagaqartunik tarnikkut isumaginninnikkullu siunnersuisarneq pillugu ilassut, ilitersuisarnerup ilaatut, aamma Siunnersuisarnermut Siunnersuisoqatigiit katitsigaanerat pillugu allannguut, aamma kalaallisuuani iluarsiiisutit § 11, imm. 2, § 12, imm. 1, § 12, imm. 2, oqaaseqatigiit aappaat, aamma § 25 inatsisip kalaallisut oqaaseqaataani.)^[1] atuutilernissaanik aalajangersakkanik makkuninnga imaqarpoq:

§ 2

Inatsisartut inatsisaat atuutilissaaq 1. januar 2019.

Inatsisartut inatsisaat nr. 18., 1. december 2018-meersoq (Nuna tamakkerlugu ilitersuisarnermi iliuusissanik periusissiornerup ilanngunneqarnera aamma naammassinninnissamut ikaarsaariarnissamullu siunnersuinermit piumasaqaatip ikkunneqarnera)^[2] atuutilernissaanik aalajangersakkanik makkuninnga imaqarpoq:

§ 2

Inatsisartut inatsisaat atuulissaaq 1. januar 2022.

Imm. 2. Inatsisartut inatsisaanni § 1, nr. 2-mi § 10, imm. 4, 1. januar 2022 sioqqullugu ilitersuisarnermik suliaqartutut taaneqartuni inunnut atorfeqartunut atorneqassanngilaq.

Isumaginninnermut, Suliffeqarnermut Nunamullu Namminermut Naalakkersuisoqarfik, ulloq 26. april 2025

Aka Grønvold (atsior.)

Naalakkersuisoqarfimmi pisortaagallartoq

/ Mehdi Shams (atsior.)

^[1] Inatsimmi allannguutit § 3, § 7, imm. 2, § 7, imm. 3, § 9, § 11, imm. 2, § 12, imm. 1, § 12, imm. 2, 2. pkt., § 18, imm. 1, § 18, imm. 2, § 25 aamma Inatsisartut inatsisaata aqqa.

^[2] Inatsimmi allannguutit § 3, nr. 10, § 10 aamma § 13.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut